

25 AUGUSTUS 2019



3iG

'n saam-glo dissipelskap gesprek

saam bid

Ons vind nie tyd vir gebed nie, ons maak dit.

B.I.D. staan vir:

B: Bely teenoor God Wie Hy vir jou is en bely ook jou gesukkel vir Hom.

I: Intree vir ander (bv. Jou 3iG-lede, jou familie, wêreld, ens.).

D: Dankie-sê, maak daagliks jou dankie-lys en dank God daarvoor.

LEWENS-LEUSE: Bely elke oggend en aand 1 Kor. 9:23 se waarheid:

^{*23}"Dit alles doen ek ter wille van die evangelie, sodat ek aan die vrug daarvan deel kan hê."

saam groei

Ons lees nie die Bybel nie, ons laat die Bybel ons lees.

Die skrywer van die Hebreërs-preek bring ons by 'n prentjie uit die Ou Testament waar die heiligheid, grootheid en almag van God duidelik raakgesien kan word. Daar is ook baie ander voorbeelde uit die Bybel waar mense wat naby God se teenwoordigheid gekom het, baie bang geword het. Die aarde het gebewe. Storms het gewoed. Wolke het saamgetrek. Die aarde het gebrand. Donderstorms het uitgebreek... en skielik besef die mens hoe klein hy werklik is. Wanneer 'n mens tot dié besef kom, raak jy verskriklik bang. Dan besef jy dat God almal oombliklik kan verwoes. Selfs Moses, God se geroepene, die een met wie God soos met 'n vriend gepraat het, kon dit nie hou nie. "Alles wat daar by die berg gebeur het, was so skrikwekkend dat selfs Moses geskree het: 'Ek staan en ruk, so bang is ek.'" Op 'n manier is God se heiligheid te groot vir ons mense se verstand. Soos die psalmdigter wil ons ook vra: Wie is ons, God, dat U aan ons dink? Lees teen hierdie agtergrond Hebreërs 12:18-29.

saam gesels

Jesus ver wag van ons minder nastaar (admiration) en meer naleef (imitation).

1. Deel met mekaar julle vreugdes en vrese van die afgelope week.
2. Hebreërs 12:18-24 kan beskryf word as die verhaal van twee berge: van Sinai tot Sion. Die ervarings by Sinai sou met die woord "vrees" opgesom kon word, terwyl die ervarings by Sion heeltemal anders daarteenoor in die woord "feesvreugde"

3 STAPPE

'n 3iG-groep is 'n saam-glo groep wat deur bid, groei en dien Jesus dieper volg. Drie mense wat kies om saam te bid, saam te luister en saam ons geloof te leef.

2 ANDER

Dit is slegs ek en 2 vriende wat 'n spontane groep vorm. Dit kan egter ook uit meer as drie mense wees: ons familie of vriende of kollegas of mense in die gemeente.

nouts
praktiese wysheid...

beskryf kan word. Of ons sou die ervarings by die hierdie twee berge ook met die woorde "afstand" en "nabyheid" kon beskryf. Bespreek watter van hierdie twee berg-ervarings die naaste aan jou eie ervaring van God is. Waarom sê jy só?

3. Besin saam daarvoor of daar by ons as navolgers van die Here Jesus 'n "vrees vir die Here" behoort te wees. Motiveer julle antwoorde.
4. Verklaar wat die vernaamste rede is vir die feesvreugde by die berg Sion.
5. Vir die Hebreër-gemeente het nog niks verander nie. Alles het nog maar uitgesluit gelyk. Kyk hulle egter met die geloofsoog, beleef hulle alreeds iets van daardie feestelike samekoms by die berg Sion, staan hulle as't ware alreeds in die poorte van die Godstad. Hoe kan ons mekaar help om op hierdie toekomsgerigheid van ons geloof te fokus, te midde van die werklikhede, probleme en uitdagings van elke dag? Wat sal die uitwerking daarvan op ons wees as navolgers van Jesus?
6. Verduidelik vir mekaar die noodsaaklikheid daarvan om na God se stem te luister en nie af te wys nie. Hoe luister julle na die stem van die Here?

saam stap

Eers vorm ons gewoontes en dan vorm die gewoontes ons.

Geloofsgewoonte: **Om God se beloftes in sy Woord te memoriseer.** Met hierdie geloofsgewoonte leer ons om deur middel van herhaling God se lewegewende beloftes te alle tye en onder alle omstandighede aan vas te hou, ten einde die geloof in ons aan te vuur. Lees hieroor Ps. 119:11, 97; Luk. 24:8; 2 Pet. 1:13, 15; Jes. 62:6.

Doen-dinge:

1. Leer om van die liedere in die Liedboek van die Kerk, wat vir jou besondere betekenis het, te memoriseer.
2. Skryf 'n belofte van die Here wat jy raakgelees het op 'n kaartjie en plak dit teen die yskas of spieël. Lees die belofte elke dag en herhaal dit totdat jy dit ken. Wanneer jy die belofte ken, beweeg dan eers na die volgende belofte en memoriseer dit op dieselfde wyse.
3. Probeer om 'n hele hoofstuk in die Bybel wat jou na aan die hart lê te memoriseer.

Dink-dinge:

1. Wat, dink jy, is die voordele daarvan om Bybelbeloftes te memoriseer?
2. As jy in eensame afsondering aangehou sou word, waaraan sou jy uit die Bybel kon vashou?
3. Dink na oor beloftes wat jy met ander in moeilike omstandighede kan deel.

1 GESREK

Ons maak weekliks met mekaar kontak (deur 'n koffie-afspraak of telefonies) rondom die gefokusde saam-gesels van die week. Die leier – wat elke week wissel – sorg dat ons mekaar daardie week sien.